

# Ils implants da tir chaschunan custs

■ (anr/ac) Enfin l'onn 2020 ston 253 implants da tir en il chantun Grischun vegnir equipads cun tschiffaballas artificials. Quai per impedir ch'ils daners da la confederaziun a favur da la sanaziun dals tschiffaballas existents crodian. Vischnancas ed uniuns da tir ston investir ils proxims trais onns tranter tschintg e nov milliuns francs. Vitiers vegnan anc ils custs per sanar ils in-drizs vegls contaminads. Ils implants da tir grischuns ston vegnir equipads cun in tschiffaballas artificial. Enfin ussa posedan sulet 44 implants da tir en il Grischun in tal equipament. Il chantun vul impedir ch'i vegnia anc sajettà a partir da l'onn 2020 sin implants cun tschiffaballas da terra. Quai per na perder contribuiziuns da la confederaziun dad 5,6 milliuns francs a la sanaziun dals tschiffaballas da terra. Enfin l'onn 2020 ston dentant anc 68 implants da tir da 300 meters vegnir equipads cun in tschiffaballas artificial e 185 implants da tir da distanza curta. Quai scriva la regenza grischuna en sia resposta a la dumonda dal deputà *Filip Dosch* (pcd Surses). La regenza scriva vinavant da custs tranter 5000 e 10 000 francs per schiba per ils tschiffaballas artificials. Contribuiziuns a favur dals in-drizs da tschiffaballas artificials na dettia i betg. La summa totala da tschintg enfin nov milliuns francs definada da la regenza per comprar ed installar ils tschiffaballas artificials ston vegnir impundids complettamain da las vischnancas e da las uniuns da tir. Ils tschiffaballas artificials san dentant era vegnir endrizzads avant ch'ils rempars da terra existents èn sanads, scriva la regenza en la resposta. Durant decennis han rempars da terra servi sco tschiffaballas dals implants da tir en il chantun Grischun.

## Sulet 34 tschiffaballas èn sanads

Quels rempars na ston betg sulet vegnir remplazzads da tschiffaballas artificials,



Deputà Filip Dosch, pcd Surses.

MAD

ils rempars da terra valan per contaminads da las restanzas da la muniziun. Sco quai che la regenza grischuna scriva sin la dumonda dal deputà Dosch èn enfin ussa 34 tschiffaballas dad implants da tir en funcziun sanads, 253 tschiffaballas ston anc vegnir sanads. I sa tracta dentant sulet da tschiffaballas dad implants da tir ch'èn anc en funcziun. Exact quants tschiffaballas che ston totalmain vegnir sanads en il chantun Grischun na scriva la regenza betg en sia resposta. Sper ils implants da tir en funcziun existan anc intgins tschiffaballas betg sanads dad implants da tir che n'èn betg pli en funcziun. Definà ha la regenza grischuna dentant ils custs totals da la sanaziun da tut ils tschiffaballas grischuns. Ella ha fatg quai sin fundament dals custs da sanaziun dals implants enfin uss sanadas. Uschia quinta la regenza cun custs totals da 18,9 milliuns francs per la sanaziun dals tschiffaballas da terra contaminads. Il chantun Grischun contribuescha trais milliuns francs e la confederazin 8,2 milliuns francs uschia che las vischnancas ston quintar da surpigliar anc 7,7 milliuns francs da la sanaziun.